

DOMENIE XVI «VIE PAL AN»

Jutoris pe Liturgjie

Domenie, ai 23 di Lui dal 2017

Gjesù in cheste domenie al continue a istruînus midiant des parabolis. Nus dîs: Il ream dai cîi (o di Diu) al è compagn di un cjamp li che cul forment e comparî ancje la zizanie... compagn di un grignel di senape... di un pugn di levan... Nissun sorestant di chest mont al puartarès chescj paragons par presentâ il so ream sui gjornâi o a la television o vie internet.

Dut chest nus fâs capî che il ream di Diu - la presince dal amôr di Diu fra di nô - e je une realtât che si insede tal mont, però: dait une cjalade: no son tancj framieç di vualtris i sapients... i potents...i grancj. Ma Diu al à sielzude ce che e je matetât dal mont... debolece...ce che nol à nissun valôr e ce che al è sbeleât...(Cfr. 1 Cor 1, 26-29).

Cumò o savin fra ce personis che si insede il ream di Diu; che in plui, al è malsigûr come forment e zizanie insiemi, che nancje si lu viôt, come il grignel di senape, che adiriture al scomparis come il lavan te farine. Ce realtâts straniis, mistereôsis, fûr di plomp e fûr dal nestri mût di viodi e che... nus fasin tignî sierade la bocje e rifleti!

Propit al è vêr ce che i rispuindê Gjesù a Pilât: Il gno ream nol è di chest mont (Zn 18, 36).

Olmât chest, o podìn ancje començâ a domandâsi: Tes nestris comunitâts che si disin cristianis, dulà cjatîno - in glesie, fûr di glesie - il grignel di senape e il pugn di levan, il florî dal ream di Diu, l'amôr di Diu e dal prossim sul esempli di Gjesù?

Antifone di jentrade

Sal 53,6.8

Ve, il Signôr al vignarà a judâmi,
il Signôr al ten sù la mê vite.
Cun dut il cûr ti ufrissarai il sacrifici,
il sacrifici di laut al to non ch'al è bon, Signôr.

Colete

Cjale di bon voli, Signôr, i tiei servidôrs
e multipliche sore di lôr i regâi de tô gracie
par che, ferbints te fede, te sperance e tal amôr,
a condurin tal meti in vore cun fedeltât i tiei comandaments.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Sap 12,13.16-19

Tu tu dâs di mendâsi dopo dai pecjâts.

*In zornade di vuê si sint a dî spes: "Nol covente il Signôr par jessi bogns e par fâ dal ben".
Il ream di Diu nol è une filantropie o un amôr universâl o un volê ben lassant che dut cori restant come che al è.*

*Gjesù nol è di chest parê. Par lui bisugne nudrî il nestri piçul amôr cuntun amôr plui grant,
bisugne lâ a la risultive: rivâ a Diu, parcè che Diu al è amôr (1 Zn 4, 8).*

*In chest sens, la leture di vuê, scrite tal secul un p.d.C. tal mont paian di Alessandrie d'Egjit,
nus ven in jutori cu lis sôs riflessions sul mût di volê ben dal Pari dai cîi.*

Dal libri de Sapience

No 'nd è Diu fûr di te ch'al vedi cûr par dut,

par che tu scuegnis dimostrâ
che no tu âs giudicât cence justizie.
La tô fuarce di fat e je principi di justizie;
la tô paronance sun dut ti fâs tratâ ducj cun remission.
Di sigûr tu tu palesis la tô fuarce
cuintri di chel che nol crôt te perfezion de tô potence
e tu sbassis la temeritât di chei che le cognossin.
Ma tu, che tu sês paron de fuarce,
tu judichis cun moderazion
e tu nus rezis cun grande remission,
parcè che il podê, cuant che tu vuelis,
tu lu âs simpri a puartade.
Cun chestis voris tu i âs insegnât al to popul
che il just al à di jessi anje uman
e tu ur âs dade ai tiei fîs la buine sperance
che tu ur darâs di mendâsi dopo dai pecjâts.
Peraule di Diu.

SALM RESPONSORIÂL

dal Salm 85

Il salm, plui lunc tal original (Salm 86 dal Salteri), nus presente culî, come la prime leture, un Diu splendit te misericordie e te fedeltât. Par chest o podìn invocâlu cun fiducie disint:

R. Tu tu sês bon, Signôr, e tu perdonis.

Se cjantât: Il cjant dai salms responsriâi, p. 66.

Ve dûl di me, Signôr,
ch'ò stoi berlant viers di te dute la zornade.
Slungje la tô orele, Signôr, cuant che ti prei,
sta atent a la mê vôs che ti sconzure. **R.**

Dutis lis gjernaziis che tu âs creadis
a vignaran di te, Signôr,
si butaran in zenoglon a la tô presince
e i daran al to non la laude.
Tu tu sês grant e tu fasis robonis;
dome tu tu sês Diu! **R.**

Ma tu, Signôr, tu sês un Diu plen di dûl e di boncûr,
pegri tal inrabiâti
e splendit te misericordie e te fedeltât.
Ven incuintrimi cul to boncûr. **R.**

SECONDE LETURE

Rm 8,26-27

Il Spirt al pree par nô cun zemits che no si rive a contâju.

Al è di grant confuart e consolazion ce che l'Apuestul nus sta disint. Parcè che in chescj agns, ore presint, come persone, come popul, come comunitâts cristianis no savin nancje nô ce ch'al va ben domandât. O almancul cussì al semearès.

Fradis, il Spirt nus da une man e nus jude te nestre debolece... il Spirt ch'al pree par nô... Se o vin cunfusion di fûr e sconfuart di dentri, o savin dulà lâ a cirî.

De letare di san Pauli apuestul ai Romans

Fradis, il Spirt nus da une man e nus jude te nestre debolece; di fat no savin nancje nô ce ch'al va ben domandât, ma al è propit il Spirt ch'al pree par nô cun zemits che no si rive a contâju. Ma chel ch'al staze i cûrs, al sa ce ch'al pense e al breme il Spirt, parcè che al domande pai sants seont il volê di Diu.

Peraule di Diu.

CJANT AL VANZELI

cf. Mt 11,25

R. Aleluia, aleluia.

Benedet sêstu tu, Pari, Signôr dal cîl e de tiere,
parcè che ai piçui tu âs palesât i misteris dal ream dai cîi.

R. Aleluia.

VANZELI

Mt 13,24-43

Lassait ch'a cressin ducj i doi fintremai al racolt.

La salvece dai servidôrs de parabule e je stade chê di domandâ al paron dal cjamp ce che al jere di fâ. La rispueste e je stade: Lassait ch'a cressin ducj i doi, che al vûl dî: Tignît dût tal ben, pazientant tal mâl; lavorait pal ream di Diu, savint che al continuerà a regnâ il ream dal diaul.

Si podarès dî che culî Gjesù al racomande la resistence passive e la no-violence fint al voleit ben ai vuestris nemîs (Lc 6, 35). Che nol vûl dî “sierait i vôi, dait reson al prin che al passe, stait cu lis mans in man”; al vul dome dî: No sta lassâti vinci dal mâl, ma vinç il mâl cul ben (Rm12, 21).

Il ream di Diu al larà indevant cussì fint a la otave beatitudine: Furtunâts chei che a son perseguitâts par colpe de justissie, parcè che il ream dai cîi al è lôr. (Mt5, 10) e fint a la fin dal mont cuant che: il Fi dal om al mandarà i siei agnui.

E il rem dai cîi al restarà simpri come un grignel di senape, compagn di un pugn di lavan.

I servidôrs dal ream dai cîi a vivin in chest clime, a son servidôrs di chest re; un re di patiments e di glorie che su la crôs al pues ancjemò dî: In chest mont o vês ce patî, ma faseitsi fuarts: jo o ai vinçût il mont! (Zn 16, 33).

Dal vanzeli seont Matieu

In chê volte, Gjesù al contà a la fole une parabule: «Il ream dai cîi al è compagn di un om ch'al semenà semence buine tal so cjamp. Biel che i oms a durmivin, al rivà il so nemî, al semenà framieç dal forment la zizanie e si slontanà. Cuant che il forment al diventà grant e al rivà al spi, in chê volte e comparì ancje la zizanie. I servidôrs a lerin dal paron e i diserin: Paron, no âstu forsit semenade semence buine intal to cjamp? Cemût mai cumò and ese zizanie? Ur rispuindè: Cheste me à fate il nemî. I servidôrs i disin: Vuelistu ch'o ledin a gjavâle fûr di lidrîs? E lui: No, parcè che al è pericul che, gjavant di lidrîs la zizanie, o gjavais di chê strade ancje il forment. Lassait ch'a cressin ducj i doi fintremai al racolt; te stagion dal racolt ur disarai ai seseladôrs: Ingrumait prime la zizanie e peaitle in balçûi par brusâle; po o cjapais sù il forment pal gno cjast».

Ur contà un'altre parabule disint: «Il ream dai cîi al è compagn di un grignel di senape che un om al cjapà e lu semenà tal so cjamp. E je di sigûr la plui piçule di dutis lis semencis, ma cuant che al è cressût al è il plui grant di dutis lis jerbis dal ort: al pues diventâ ancje un arbul e cussì i ucei dal cîl a puedin vignî a fâ il nît framieç dai siei ramaçs».

Ur contà un'altre parabule: «Il ream dai cîi al è compagn di un pugn di levan che une femine e cjape e lu messede in trê misuris di farine, fin che dute la paste no je jevade».

Dutis chestis robis Gjesù ur es disè a lis folis in parabolis e ur fevelave dome in parabolis, par che si colmàs ce ch'al veve nunziât il profete, là ch'al dîs: “O vierzarai la mê bocje in parabolis o publicarai robis platadis fin de fondazion dal mont”.

Alore, lassade la int, al jentrà in cjase e i siei dissepui i lerin dongje disint: «Spieghinus mo la parabule de zizanie tal cjamp». Ur rispuindè: «Chel ch'al semene la buine semence al è il Fi dal om; il cjamp al è il mont; la semence buine e je il spieli dai fîs dal ream e la zizanie invezit dai fîs dal

mâl; il nemì che le à semenade al è il diaul; il seselâ al è la fin dal mont e i seseladôrs a son i agnui. Come che si ingrume la zizanie e si brusile tal fûc, cussì al sucedarà a la fin dal mont: il Fi dal om al mandarà i siei agnui a tirâ dongje dal so ream ducj i scandui e ducj chei ch'a fasin dome mâl, par butâju te fornâs infogade. Li al sarà dut un vaî e un crustâ di dincj. Alore i juscj a lusaran come il soreli tal ream di lôr Pari. Chel ch'al à orelis, ch'al scolti!».

Peraule dal Signôr.

Su lis ufiertis

Diu, che inte perfezion di chest unic sacrifici
tu âs consacrade la diference cu lis vitimis de leç viere,
acete il sacrifici dai tiei servidôrs fedêi,
santifichilu come che tu âs santificât i regâi di Abêl
e ce che ognidun al ufris a la tô maiestât,
ch'al zovi pe salvece di ducj.
Par Crist nestri Signôr.

Antifone a la comunion

Sal 110,4-5

Al à lassade memorie dai siei spetacui:
al à dûl il Signôr e al è bon di cûr,
ur à dade la bocjade a di chei che lu rispjetin.

O ben: Ap 3,20

Ve: jo o stoi a la puarte e o tuchi, al dîs il Signôr.
Se un al scolte la mê vôs e mi vierç la puarte,
o jentrarai li di lui, o cenarai cun lui e lui cun me.

Daspò de comunion

Signôr, ti preìn, cjale di bon voli il to popul
e, daspò di vèlu inscuelât cui misteris dal cîl,
dai di passâ de viere a la gnove vite.
Par Crist nestri Signôr.

* * *

Riflession di pre Antoni Beline: **Il nemì nol duâr**

E je une parabule fenomenâl, che nus splane tancj di chei cantins che mai e che i omps a àn bassilât daprûf un disordin par dâsi une reson. Cemût mai che il mont, fat di un Diu ch'al è (o almancul che si dîs) bon e pari, al è cjamât di tristerie e di inicitât? Donde vegnie dute cheste tristerie e dut chest mâl? E parcè Diu ur filial tant il laç ai triscj ch'a lambichin i bogns e istes ur va simpri drete?

Vanseli par un popul, an A, p. 167

* * *

Sante messe e Eucaristie, rîts, preieris, cjants: Hosanna pp. 34 - 119.

* *

***Diu nus à regalât la glesie
come cjase dal perdon e de misericordie
e no come templi dal dirit.***

pre Antoni Beline

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- * *Par domandâ chescj libris scrivêt a info@glesiefurlane.org*